

04 SEP 1997

Wanita-Bon

PERGERAKAN WANITA AKAN KUMPUL DANA UNTUK BELI BON KHAZANAH

KUALA LUMPUR, 4 Sept (Bernama) -- Ketua Wanita Umno Datuk Dr Siti Zaharah Sulaiman berkata pergerakan itu sedang mengumpul dana untuk membeli bon daripada Khazanah Holdings Berhad, cabang pelaburan kerajaan, sebagai langkah menyokong pasaran saham.

Katanya pergerakan itu mampu mengumpul dana yang besar memandangkan ia mempunyai banyak anggota yang melabur dalam koperasi dan skim amanah saham.

"Pergerakan Wanita sedang memikirkan strategi untuk mengumpul dana itu," katanya kepada pemberita semasa waktu rehat persidangan Wanita Umno di Pusat Dagangan Dunia Putra.

Perdana Menteri Datuk Seri Dr Mahathir Mohamad semalam mengumumkan pakej bernilai RM60 bilion untuk menyokong pasaran saham yang jatuh teruk. Agensi-agensi kerajaan akan menyumbang RM30 bilion dan Khazanah Holdings RM30 bilion menerusi terbitan bon.

Timbalan Perdana Menteri Datuk Seri Anwar Ibrahim hari ini berkata Khazanah Holdings akan menerbitkan bon itu bersama dengan sebuah lagi agensi secara berperingkat-peringkat mulai pertengahan bulan ini yang berasaskan perbankan Islam, perbankan konvensional dan melalui bentuk-bentuk lain.

Siti Zaharah berkata pergerakan berpendapat cara lain mengatasi masalah yang dihadapi negara berikutan kejatuhan pasaran saham dan mata wang negara ialah berjimat dengan mengelak daripada berbelanja dan menyokong barangan tempatan.

Wanita akan melaksanakan kempen di kalangan anggotanya supaya mula membeli barangan tempatan, katanya.

"Kita mesti yakin dengan tindakan dan strategi kepimpinan negara yang dibuat secara kolektif dan pergerakan menaruh penuh keyakinan ia dapat diatasi.

"Kita juga rasa kecewa terhadap rakyat tempatan yang turut terlibat dalam menjatuhkan pasaran saham negara," katanya. -- BERNAMA

ARA RON